

A.T.A ta yama Danki na Candido Tromp cu tambe ta Contribui na un Aruba Mas Dushi



ORANJESTAD - Aruba Tourism Authority a lansa e campaña 'Danki Aruba' den e espirito di fin di aña. Pa medio di e campaña aki ta reconoce heroenan cu ta haci di Aruba uno dushi pa biba y como tal uno dushi pa bishita. E ciudadano ehemplar cu ta wordo reconoci ta Candido Tromp.

Candido Tromp ta un atleta den arte marcial na Aruba. Desde aña 1975 Candido a cuminsa practica Judo y a representa nos isla den e deporte aki den exterior y bin cas cu hopi medaya. Candido Tromp semper a dedica su tempo liber pa asina siña muchanan e deporte y asina ta comparti su pasion pa e deporte aki. E vision di Candido ta pa encurasha muchanan pa siña stima e deporte y haci esaki parti di nan bida. Boluntariamente Candido ta duna les na Tanki Leendert Judo Center y ta guia nos muchanan den no solamente Judo sino otro deportenan tambe.

Tanki Leendert Judo Center a wordo funda na aña 1982 pa Candido Tromp conhuntamente cu Sebastian Falcon Tromp. Hunto nan a traha e centro di deporte aki sin subsidio adicional di otro organisacion of fundacionnan. E meta pa lanta e centro di deporte aki tabata pa duna oportunidad na tur muchanan pa siña e deporte di Judo. Candido Tromp mes tabata e sensei pa hopi aña y duna hende grandi y muchanan les di Judo y otro deportenan entre otro aerobic. Na aña

2005 sensei Alexis Cardenas a cuminsa duna les na e muchanan di e centro di deporte aki. Te cu dia di awe Candido ta hunga un rol hopi importante pa e centro di deporte aki y ainda e sa duna les na su muchanan. Candido tambe ta un persona hopi conoci den comunidad pa su gestonan cu e ta ofrece di curason na hendenan cu tin mester di su ayudo y asina aki e ta aporta boluntariamente na nos comunidad den un forma unico.

Ta danki na esfuerso boluntario asina riba nos isla, e persistencia y bon boluntad nos isla ta resalta. E factor principal di nos turismo ta nos hendenan, nos mes, y p'esey A.T.A. kier presenta un mensahe di reflexion e aña aki pa medio di 'Danki Aruba'. Yamando danki na personanan ehemplar manera Candido Tromp. Danki Candido. Semper cu un sonrisa Candido a comparti y duna otro un humilde man, dunando su aporte aña den y aña afo. Esakinan ta sigur caracteristicanan cu mester pa no solamente nos turismo desaroya na un manera duradero y saludabel, pero pa simplemente nos comunidad por biba na un manera feliz, den harmonia cu otro. Subi online ariba www.dankiaruba.com, Facebook y Instagram di Oficina di Turismo Aruba pa sigui e campaña di 'Danki Aruba'. Den nomber di Aruba Tourism Authority nos kier gradici cada un di nos hendenan pa nan lucha incansabel durante 2016 y kier desea nos comunidad feliz dianan di fiesta y un One Happy 2017.

